

2. Նախաճառ

ԱՐԱԲԱՅԻ ՈՍՏԻԿԱՆՆԵՐԸ ՀԱՅԱՍՏԱՆՈՒՄ¹

(7-րդ դարի վերջից մինչև Աշոտ Ա-ի գահակալությունը)

Արաբական խալիֆայի տիրապետության ժամանակաշրջանում արաբների իշխանությունը Հայաստանում ներկայացված էր հանձին արաբ կառավարչի՝ ոստիկանի, որի պաշտոնն էր.

1. հսկել երկրի ներքին կացության, Հայաստանի իշխանի և նախարարների վրա.

2. հսկել տուրքերի կանոնավոր գանձման վրա.

3. զսպել ժողովրդական ապստամբական շարժումները.

4. հետևել սահմանագլխի պաշտպանությանը, հյուսիսից՝ խազարների և արևմուտքից՝ բյուզանդացիների դեմ, և կամ մեկնակետ ունենալով Արմինիան, արշավանքներ կատարել դեպի այդ երկրները: Կառավարիչը, ուրեմն փաստորեն Արմինիայում գտնվող արաբական բանակների հրամանատարն էր.

5. ուղղակի կերպով կառավարել Հայաստանի հողի վրա հաստատված մահմեդական գաղութները:

Ամբողջ խալիֆայի սահմաններում Օմայանների ժամանակաշրջանում եղել են հինգ փոխարքայություններ, Աբբասյանների ժամանակ մի քիչ ավելի: Ընդհանրապես Արմինիան (Հայաստան, Վրաստան, Աղվանք), Ատրպատականը, արևելյան Փոքր Ասիան, հյուսիսային Միջագետքը միասին վերցրած կազմում էին մի փոխարքայություն: Կառավարիչը կոչվում էր «ամիր» կամ «վալի»: Յուրաքանչյուր նահանգի մեջ նա ուներ իր «ամիր» կոչված փոխանորդը: Կառավարիչներին հայ պատմիչները կոչել են զանազան անուններով՝ «հրամանատար դատաւորութեան և հարկապահանջութեան», «վերակացու», «մարզպան», իսկ Հովհաննես կաթողիկոսն ու Ասողիկը կոչել են «ոստիկան», և այս անունն է գործածական դարձել մեզ մոտ:

Հայաստանի ոստիկանների ցուցակը կազմելու մի քանի փորձեր են կատարվել, որոնցից կարևորն են Մ. Ղազարյանի², Ժ. Լոռանի³ և Ռ. Ֆասմերի⁴ փորձերը: Այդ հեղինակների կազմած ցուցակները չենք կարող լիակատար համարել, որովհետև նրանք չեն օգտվել բոլոր աղբյուրներից: Ֆասմերը, որ բացի պատմական աղբյուրներից, օգտագործել է նաև դրամագիտական տվյալները, տալիս է թերի ցանկ՝ սկսելով 750 թ. և չօգտագործելով մի քանի աղբյուրներ: Ներկա ցուցակը կազմելիս, որը պարունակում է և՛ կառավարիչների և

¹ Սույն հոդվածի վրա հեղինակը որոշ աշխատանք ուներ կատարելու, որ նա չհասցրեց անել հիվանդության և մահվան պատճառով: Սակայն Հայաստանի՝ արաբական ոստիկանների ներկա ցանկը համարյա ամբողջական է, դիտական կարևորություն է ներկայացնում և կարող է ծառայել իբրև վստահելի տեղեկատու նյութ: (Ծան. խմբ.):

² M. Ghazarian, Armenien unter der arabischen Herrschaft bis zu Erstehung des Bagratiden Reiches, Marburg, 1903.

³ J. Laurent, L'Arménie entre Byzance et l'Islam, depuis la conquête arabe jusqu'en 886, Paris, 1919.

⁴ Ռ. Ֆասմեր, ժամանակագրություն Հայաստանի ոստիկաններու առաջին արասյանց օրով, Թարգմ. Վ. Ն. Ինդիլիդյան, Վիեննա, 1933:

փոխարքանների անունները, օգտագործել ենք հայկական, արաբական և բյուզանդական պատմական աղբյուրները: Օգտագործել ենք նաև Ֆասմերի գործը դրամագիտական տվյալների համար:

Արաբական աղբյուրներից Բելազորին, Յակուբին, իբն Միսքավայհը և Թարարին շունենալով ձեռքի տակ, օգտվել ենք հալաթյանի թարգմանությունից¹, իսկ մյուս արաբական աղբյուրները՝ իբն ալ-Աթիրը, իբն հալդունը, Տաղրիբերդին, իբն հալիֆանը ուղղակի բնագրից ենք օգտվել:

Հայաստանը արաբների կողմից առաջին անգամ նվաճվելուց (640 թ.) մինչև կես դար, փոխն ի փոխ ենթարկվեց բյուզանդացիների և արաբների ավերիչ ասպատակություններին և վերջնականապես ընկավ խալիֆայի գերիշխանության տակ Աբդուլմալիք (685 թ.—705 թ.) խալիֆի ժամանակ:

Սրա իշխանության սկզբի տարիներին խալիֆայական սահմաններում ծագեցին մի շարք խռովություններ: Ամենից ավելի ծավալուն եղավ Աբդալլահ իբն-Ջուբայրի ապստամբությունը: Ջուբայրը 683 թվին, Եգիպտոսի մահից հետո, իրեն խալիֆ հռչակեց Մեքքայում և մինչև 693 թվը սպառնաց Օմայանների գահին: Հայերն էլ՝ օգտվելով այդ Ջուբայրի շարժումից, ինչպես ասում է Բելազորին, ապստամբեցին: Աբդուլմալիքը մեծ դժվարությամբ զսպեց ազ-Ջուբայրի ապստամբությունը: Նույն խալիֆը հաջող կոխվեց մղեց նաև Բյուզանդիայի դեմ, որի հետևանքով բյուզանդացիները հրաժարվեցին Հայաստանը վերագրավելու իրենց փորձերից:

Ներքին և արտաքին վտանգները հեռացնելուց և իր գահն ապահովելուց հետո Աբդուլմալիքը մի շարք վարչական ու ֆինանսական միջոցառումների դիմեց, նրա ժամանակ խալիֆայի պետական ներքին ապարատը ստացավ որոշ ձև:

Արմինիայի ոստիկանների շարքը սկսվում է, ուրեմն, այս խալիֆի օրից: Նա առաջին անգամ ոստիկան նշանակեց իր եղբորը:

1. Մուհամմադ իբն Մուաւին (693—709 թ.), նրա նշանակման մասին պատմական աղբյուրները տալիս են տարբեր թվականներ: Թեոփանեսը (Chronographia, էջ 188) տալիս է հունական 6184 թ., որը համապատասխանում է մ. թ. 692-ին: Կաղանկատվացին (էջ 366) տալիս է հայոց 145 թ. (մ. թ. 696): Բայց սա նրա երկրորդ անգամ գալու թվականն է: Իբն ալ-Աթիրը (Դ 176), իբն հալդունը (Գ 70), Տաղրիբերդին (Ա 120) տալիս են Հիջրի 73 թվականը (մ. թ. 692—693): Բելազորին (էջ 54) թվական չի տալիս, ասում է միայն, թե Աբդուլմալիքը ուղարկեց նրան հայերի դեմ: Բայց որովհետև նա էլ Մուհամմադի ոստիկան նշանակվելը կապում է ազ-Ջուբայրի ապստամբության հետ, նրա աված տեղեկությունը համընկնում է 693 թ.: Յակուբին (էջ 105) խոսում է Մուհամմադի կառավարիչ նշանակվելու մասին, բայց չի հիշատակում թվականը: Ըստ Ղևոնդի (էջ 40) Մուհամմադը եկավ Աբդուլմալիքի 16-րդ տարին, այսինքն 701 թ., հետևաբար նրա առաջին գալու մասին չէ խոսքը, այլ երկրորդ գալու, որն իրոք այդ թվին է: Վարդանն ասում է, թե Մահմեդին ուղարկեց Մրոտանը (պետք է իմանալ Մրոտան 1-ինի որդի Աբդուլմալիքը), բայց նա էլ չի հիշում թվականը:

Բոլոր տվյալներից հետևում է, որ Մուհամմադը նշանակվեց ոստիկան 693 թ.:

¹ Ի. Խալաբյանց, Արաբացի մատենագրեր Հայաստանի մասին, Վիեննա, 1919:

Թեև Մահմեդի (Մուհամմադի) ոստիկան նշանակվելու թվականը ըստ պատմիչների վկայության 693 թ. է, բայց և այնպես մինչև 698 թ. Հայաստանի հողի վրա բյուզանդական բանակները արշավանքներ էին կատարում: Հուստինիանոս Բ-ի ասպատակություններից հետո, ըստ Ղևոնդի (էջ 39), Տիրերիոս Գ Ափսիմերեսը (698—705) արշավեց Վարազտիրոցի որդի Սմբատ Բագրատունու դեմ և տեղի ունեցավ Պայիկի կռիվը, որից հետո բյուզանդացիները վերջնականապես հեռացան Հայաստանից և երկիրը ենթարկվեց արաբների գերիշխանությանը: Այսպիսով ոստիկան նշանակվելով դեռևս 693 թ. Մուհամմադը իր բանակով Հայաստան մտավ 698 թ.:

Մուհամմադի ոստիկանության տեղումնը ճշտվում է համաձայն արաբական աղբյուրների: Իբն ալ-Աթիրը (Դ 206), իբն Խալդունը (Գ 70), Տաղրիբերդին (Ա 222) որոշակի կերպով ասում են, թե Մուհամմադը հեռացվեց Հիշրի 91 թ. (մ. թ. 709—710), որով սխալ է Յակուբին (էջ 105), երբ ասում է, թե Մուհամմադը մնաց Հայաստանում մինչև իր մահը: Նա մահացավ Հիշրի 101 թ. (մ. թ. 720):

Մուհամմադ իբն Մրուանը հաճախ էր մասնակցում խալիֆայական բանակների արշավանքներին Բյուզանդիայի դեմ և ամեն անգամ Հայաստանից հեռանալիս նշանակում էր մի փոխ-կառավարի:

2. Աբդալլահ — սա հիշատակված է միայն հայ պատմիչների մոտ, և որին, թվում է, թե Մուհամմադը նշանակեց իբրև փոխանորդ 700 թ., երբ հեռացավ Հայաստանից: Սրա մասին է ակնարկում Հովհաննես կաթողիկոսը (էջ 120) ասելով «այր ժանտ ժպիրհ, ապերասան և յաւէտ շարաբարոյ», նույնը նաև Ասողիկը (էջ 101):

Աբդալլահն էր, որ Սահակ Զորափորեցի կաթողիկոսին և Սմբատ Բագրատունուն աքսորեց Դամասկոս:

3. Աբու Շայխ իբն Աբդալլահ (701—703):

Հիշրի 82 թ. (մ. թ. 701) Մուհամմադը արշավեց Հայաստան երկրորդ անգամ և հեռանալիս փոխ-կառավարիչ նշանակեց Աբու-Շայխին, որին հայերը սպանեցին հաջորդ տարին (իբն ալ-Աթիր Դ 227, իբն Խալդուն Գ 70):

4. Աբդալլահ երկրորդ անգամ (703—704):

Սրա անունը հիշատակում են հայ պատմիչները Վարդանակերտի կռիվ առթիվ: Այս Աբդալլահը շատ հավանաբար Աբդալլախի որդին էր, որը Մուհամմադի ընկերակցությամբ Իրաքի կողմերը գնաց ապստամբների դեմ կռվելու: Նաև 84 թ. գրավեց Մսիսը: Սակայն իբն ալ-Աթիրի ասելով 85—86 թ. նա Եգիպտոսի կառավարիչ էր:

Սրա բռնությունների դեմ հայերն ապստամբեցին և Վարդանակերտում ջարդեցին արաբական զորքերին: Թվում է, ուրեմն, որ Վարդանակերտի կռիվը տեղի ունեցած պիտի լինի 703 թ. վերջում՝ ձմռանը: Սամվել Անեցին (էջ 35) դնում է ՉԲ (մ.թ. 702, հասկացիր 704): Նույն դեպքից հետո Մուհամմադն արշավեց երրորդ անգամ՝ զսպելու համար հայերի շարժումը, Հիշրի 84 թ. (703-ի վերջից—704 թ. վերջ), ինչպես վկայում են իբն ալ-Աթիրը (Դ 284), Վարդանը (էջ 71): Նա մեկնելիս փոխ-կառավարիչ նշանակեց Օբրային:

¹ Այստեղ պետք է դնել Սահակ Զորափորեցի կաթողիկոսի մահվան (703 թ.) դեպքը ու Խառանի հանդիպումը: Ղևոնդը (էջ 51) և Վարդանը (էջ 71—72) Մահմեդին են հիշում, իսկ Հովհաննես կաթողիկոսը (էջ 132) և Ասողիկը (էջ 102) Օբրային:

5. Օրման իբն-Վալիդ իբն Օբբա իբն Աբի-Մուայթին (706):

Սրա մասին խոսում են Բելազորին (էջ 54), Հովհաննես կաթողիկոսը (էջ 121). «Ոբբայ ոմն զօրապետ» ասելով՝ Վանանդում կամսարականներից և Վանանդեցիներից նրա կրած պարտության կապակցությամբ, Որովհետև Ղևոնդը (էջ 54—55) Վանանդի կոիվը դնում է Վալիդի խալիֆայության սկզբի տարում, հետևաբար, այդ կոիվը տեղի է ունեցել կամ 705 թվի վերջում. (Վալիդը գահակալել է 705 թ. հոկտեմբեր ամսին), կամ 706 թվի սկզբում:

6. Կապիմ կամ Կաշմ (706):

Մուհամմադը եկավ 4-րդ անգամ Հիշրի 85 թ. (մ. թ. 704) և մնաց մեկ տարի ըստ իբն ալ-Աթիրի (Դ 249) և Տաղրիբերդի (Ա էջ 309), լուծելու համար Վանանդի պարտության վրեժը և ծրագրեց հայ նախարարների բնաջնջումն իր փոխանորդ Կաշմ ոստիկանի միջոցով: Սա տեղակալ էր արդեն Նախիջևանի կողմերում և հավաքելով հայ իշխաններին Նախիջևանի և Խրամի եկեղեցիներում (Ղևոնդ, էջ 56, Վարդան, էջ 72) այրեց նրանց: Ասողիկը (էջ 124—125) ճշտում է այդ դեպքի թվականը, որպես հայոց 153 թ. (մ. թ. 704—705), Արաբացի հեղինակներից Բելազորին և Յակուբին խոսում են հայ նախարարների հրկիզման մասին, դեպքը դնելով Խլաթում, առանց նշելու թվականը: Ավելի ուրոշ է Տաղրիբերդին (Ա 207), որը նշում է Հիշրի 84 թ. (մ. թ. 703) ավելացնելով՝ «Այդ տարին կոչվեց հրկիզման տարի»: Բայց արաբացի պատմիչի և Թեոփանեսի տված թվականը չի համապատասխանում Ասողիկի ցույց տված թվականին և անկասկած ետ է ասված մեկ տարով: Հովհաննես կաթողիկոսը (էջ 125) հայ նախարարների այրվելը վերագրում է Աբդուլալիք խալիֆին, իսկ Վարդանը (էջ 70) վերագրում է Վլիթի (Վալիդ) առաջին տարվան: Վալիդը գահակալեց 705 թ. հոկտեմբեր ամսին: Նույնն ասում է նաև Ասողիկը (էջ 124): Ինչպես տեսնում ենք, աղբյուրները՝ անհամաձայն են այս դեպքի թվականի մասին: Համենայն դեպս բոլոր վկայությունները համադրելով, կարելի է ասել, թե դեպքը տեղի է ունեցել 705 թ. կեսին: (Թեոփանեսը 6195 թ. է դնում, որը համապատասխան է մ. թ. 703 թվին, իսկ սա սխալ է):

7. Աբդ ալ-Ազիզ իբն Հատիմ ալ-Բահիլի (706—709):

Սրան ուղարկեց Վալիդ խալիֆը՝ Կասիմի խժոժություններից առաջացած խորը դժգոհության հետևանքով, հայերի շարժումը կանխելու և հայերին սիրաշահելու նպատակով: Հայ պատմիչները (Ղևոնդ, էջ 59—60, Ասողիկ, էջ 125) նրա մասին ասում են «խօթ լսելօք»: Արաբացի պատմիչներից Տաղրիբերդին միայն հիշատակում է նրա անունը իբրև կառավարիչ Հիշրի 86 թ. (մ. թ. 705) և այսպիսով ստուգվում է մեր պատմիչների տեղեկությունը:

Աբդ ալ-Ազիզի իշխանության տևողության մասին պատմիչների մոտ ուրոշ տեղեկություն չկա, բայց պատմական դեպքերից տրամաբանորեն հետևում է, որ նա մնաց Հայաստանում մինչև Մուհամմադի անվանական կառավարչության վերջը, այսինքն 709 թ.:

Աբդ ալ-Ազիզը վերաշինեց ավերյալ Դվին քաղաքը, ամրացրեց պարիսպներով և շրջապատեց խրամով: Այդ օրից Դվինը դարձավ արաբացի ոստիկանի նստավայրը Հայաստանում և արաբական տիրապետության միջնաբերդը:

¹ Այստեղ պետք է դնել Սահակ Ջորափորեցի կաթողիկոսի մահվան (703 թ.) դեպքն ու Պառանի հանդիպումը: Ղևոնդը (էջ 51) և Վարդանը (էջ 71—72) Մահմեդին են հիշում, իսկ Հովհաննես կաթողիկոսը (էջ 122) և Ասողիկը (էջ 102)՝ Ոբբային:

8. Մապամա իբն Աբդ ալ-մալիք (709—715):

Սա հաջորդ նշանակվեց Մուհամմադի, որը հետ կանչվեց Հիջրի 91 թ. (մ. թ. 709), ինչպես վկայում են իբն ալ-Աթիրը (Դ 266), իբն Խալիկունը (Գ 70), Տադրիբերդին (Ա 222), Հայ պատմիչները (Ղևոնդ, էջ 64, Ասողիկ, էջ 127) հիշատակում են «Մսլիմ»-ին ոչ իբրև ոստիկան Հայաստանի, այլ իբրև խազարների դեմ կռվող արաբական բանակների հրամանատար:

Սրա կառավարչությունը պետք է տևած լինի մինչև Վալիդ խալիֆի մահը¹, վալիդի հաջորդ Սուլայման խալիֆը (715—720), երբ գահ բարձրացավ, Հայաստան ուղարկեց այլ ոստիկան:

9. Ատի իբն ալ-Քինդիին (715—717): Սրա ոստիկան նշանակվելու մասին խոսում է Բելազորին (էջ 54):

10. Օմար իբն արդ ալ-Ազիզը (717—720):

Սրա մասին, բացի Բելազորիից (էջ 55) խոսում է նաև Կադանկատվացին (էջ 369) ասելով, թե հայոց 161 թվին (մ. թ. 712) «եկն Աբդալազիզ»: Թվականի շփոթ կա հայ պատմիչի մոտ: Թվում է, թե այս ոստիկանը ծանոթ է եղել նաև Աբդալազիզ անվամբ, քանի որ Տադրիբերդին (Ա էջ 239), Հիջրի 93 թ. (մ. թ. 717) տակ է հիշատակում Աբդալազիզին՝ որպես Հայաստանի կառավարիչ:

Մինչև Հիջրի 102 թ. պատմական աղբյուրները ուրիշ ոստիկան հիշատակած չլինելով, պետք է հետևեցնել, որ Օմարի պաշտոնավարությունը անվանապես տևել է մինչև 720 թ., այսինքն՝ մինչև Եզիդ 2-րդ խալիֆը (720—724), որի ժամանակաշրջանում ուղարկվել են շորս ոստիկաններ, սրանց թվականները ճշտվում են հետևյալ կերպով:

11. Օմար իբն Հուբայրան (720—721):

Ըստ իբն ալ-Աթիրի (Ե 48) նա Հիջրի 120 թ. (մ. թ. 720—721) վարում է Արմինիայի բանակների հրամանատարությունը:

12. Մալաֆ իբն Սաֆար ալ-Բահրանի (721):

Շատ կարճ ժամանակով տիրեց ըստ Բելազորիի (էջ 55):

13. Ջառահ իբն Աբդուլլան ալ-Հաֆամի (722—723):

Սրա մասին խոսում են Թաբարին (էջ 90—91), իբն ալ-Աթիրը (էջ 52), իբն Խալիկունը (Գ 139), Պաշտոնավարության թվականն ըստ սույն պատմիչների Հիջրի 104 թ. է (մ. թ. 722—723), իսկ ըստ Տադրիբերդիի Հիջրի 105 թ. (723—724): Նա նստեց Պարտավում, ասում է Բելազորին (էջ 55):

14. Հաբիբ իբն Ամր ադ-Թալիին (724—725):

Բելազորին (էջ 55) հիշատակում է սրան որպես Եզիդի կողմից նշանակված վերջին ոստիկան: Այս ոստիկանն է Ղևոնդի հիշատակած Հերթը, որը ըստ հայ պատմիչի ուղարկվեց Հեշմ (Հիշամ, 724—743) խալիֆի կողմից և կատարեց ծանոթ աշխարհագիրը: Կադանկատվացին (էջ 308) դնում է նրա անվա-

¹ Հովհաննես Օձնեցի կաթողիկոսի Դամասկոս այցելության կապակցությամբ հովհ. կաթ. (էջ 120) և Ասողիկը (էջ 183) հիշատակում են Վլիթ անունով մի ոստիկան: Այդ անվամբ ոստիկան չի հիշատակվում արաբական աղբյուրներում: Կարելի է նաև նրան շփոթել Վալիդ խալիֆի հետ, որովհետև Վալիդ խալիֆը մահացավ 715 թ., մինչդեռ Օձնեցին կաթողիկոս եղավ 718 թ. և նա այցելեց Վալիդի հաջորդ Օմար 2-րդ (717—720) խալիֆին, ինչպես վկայում է Վաբդանը (էջ 72), հետևաբար կարելի է սրան ենթադրարար գտնել փոխկառավարիչների շարքում՝ 717 թվին:

նումը հայոց 170 (մ.թ. 725) ձմեռը: Աղբյուրների այս տարբեր վկայությունները կարելի է հաշտեցնել, եթե ընդունենք այն, որ նա նշանակվեց Եգիպտի կողմից (սա մահացավ 724 թ. փետրվարի 28-ին) և պահեց իր պաշտոնը նրա հաջորդ Հիշամի իշխանության սկզբում, իսկ այս վերջինի օրով էր, որ խալիֆաթի ամբողջ տարածության վրա հարկերի ընդհանուր ծանրացում կատարվեց:

15. Մասլամա իբն աբդ ալ-Մալիֆ (725—729, երկրորդ անգամ) նշանակվեց Հիշամ խալիֆի կողմից Հիշրի 107 թ. (մ. թ. 725—726): Նրա մասին հիշատակում են Բելազորին (էջ 55) առանց թվականը ճշտելու և Յակուբին (էջ 106): Իսկ թվականը ճշտում են իբն ալ-Աթիրը (Ե 64), իբն հալդունը (Գ 137): Ըստ Տաղրիբերդիի (Ա 107) այդ 107 թ. Ջառահն է, որ հեռացվում է պաշտոնից, բայց Մասլամայի նշանակվելու մասին չի խոսվում: Ըստ իբն ալ-Աթիրի Մասլաման նշանակվում է որպես Հարիթի փոխանորդ: Այդ նշանակում է, որ Հարիթը որոշ ժամանակ անվանապես մնացել է որպես վալի:

16. Ջառան (724—730), երկրորդ անգամ:

Անվանվեց առավելապես խազարների դեմ կռվի կապակցությամբ Հիշրի 111 թ. (մ.թ. 729—730) ըստ Թաբարիի (էջ 91), իբն ալ-Աթիրի (Ե 112), իբն հալդունի (Գ 139), Տաղրիբերդիի (Ա 270): Նա սպանվեց խազարների դեմ կռվելիս Հիշրի 112 թվին:

17. Հաջաջ իբն Աբդալլահ ալ-Հաֆամի (730):

Իբն հալդունը (Գ 137) հիշատակում է սրան ասելով, թե կարճ ժամանակի համար հաջորդեց իր եղբոր Ջառահին՝ նրա մահից հետո:

18. Սալիդ իբն Ամրու իբն Ասուադ ալ-Հաբաշի (730—731):

Ըստ Բելազորիի (էջ 57) նա մնաց երկու տարի: Թաբարին (էջ 91), իբն ալ-Աթիրը (Ե 112), իբն հալդունը (Գ 140) նրան դնում են որպես Ջառահի հաջորդ: Ղևոնդը (էջ 143) հիշատակում է սրա անունը «Սեթայ, որում Հաբաշ կոչվեց»:

19. Մասլամա իբն ալ-Մալիֆ (731—732, երրորդ անգամ) ոստիկան է նշանակվում Հիշրի 112 թ. (731—732 թ.) ըստ Թաբարիի (էջ 91), իբն ալ-Աթիրի (Ե 74), իբն հալդունի (Գ 139) և Տաղրիբերդիի (Ա 270):

20. Մրուան իբն Մուհամմադ (732—750):

Ղևոնդն (էջ 143) ասում է, թե նա ուղղակի հաջորդեց Հաբաշին, բայց արար, բոլոր պատմիչներն էլ նրան դնում են որպես Մասլամայի հաջորդ (Բելազորի, էջ 58), (Յակուբի, էջ 107), (Թաբարի, էջ 91), (Իբն ալ-Աթիր Ե 83), (Իբն հալդուն Գ 140), (Տաղրիբերդի Ա 114): Բոլորն էլ Մրուանի պաշտոնավարության թվականը դնում են Հիշրի 115 թ. (մ. թ. 733), բացի Թաբարիից, որը դնում է Հիշրի 114 թ. (մ. թ. 732—733), ուրեմն 732 թ. վերջում:

Մրուանը մնաց Հայաստանում մինչև 744 թվականը (Իբն ալ-Աթիրը Ե 87, 101, 113):

Երբ նա գնաց մասնակցելու դինաստիական կռիվներին և դարձավ Օմայյան վերջին խալիֆ, Հայաստանում նշանակեց փոխանորդներ հաջորդաբար, որոնք են՝

21. Ասիմ իբն Աբդալլահ իբն Եգիպ ալ-Հիլալի (744):

Յակուբին (էջ 108) ասում է, թե հայերը սրան սպանեցին:

22. Խսնակ իբն Մուլիմ ալ-Օֆալի (745):

Սրա մասին խոսում է Ղևոնդը (էջ 146), իբն հալդունը որպես Մրուանի առաջին փոխանորդ: Հիշում են նաև Բելազորին (էջ 62), Յակուբին (էջ 108):

Սրա ժամանակ Բագրատունիների և Մամիկոնյանների մրցակցությունը ամենասուր բնույթն ստացավ: Օգտվելով Աշոտ Բագրատունու բացակայությունից, որը գնացել էր Մրուանի հետ, ոստիկանը հրամանատարությունը պաշտոնը տվեց Գրիգոր Մամիկոնյանին (Ղևոնդ նույնը): Դրանից հետո՝ նոր խալիֆի՝ Մրուանի հրամանով վերջինս հեռացվեց պաշտոնից, իսկ նրա եղբայր Դավիթն էլ պատժվեց: Գրիգորը վրեժ լուծեց կուրացնելով Աշոտին:

23. Մուսաֆիր իբն Կազիր (745—750), որին չի կարելի ուղղակի խալիֆի կողմից նշանակված ոստիկան նկատել, ըստ Բելազորիի (էջ 62) և Յակուբիի (էջ 168). սա օգտվեց Մրուանի հեռանալուց և մի շարք ապստամբ գնդերի գործակցությամբ՝ վերցրեց Արմինիայի կառավարչությունը և պահեց մինչև Աբբասյանների իշխանության գալը: Սրա դեմ կռվեց Իսհակ իբն Մուալիմը, որը Մրուանի կողմից նշանակված օրինավոր ոստիկանն էր:

24. Մուհամմադ իբն-Սուլի (750): Սրան Հայաստան ուղարկեց Աբու-Աբբասը՝ Օմայանների և Աբբասյանների դինաստիական բուռն կռիվների տարում (749—750 թ.):

Մուհամմադ իբն-Սուլին կռվեց Մրուանի կուսակից Մուսաֆիրի դեմ (Յակուբի, էջ 108), նաև Մրուանի կողմից նշանակված Օթայլի դեմ և սպանեց նրան:

25. Աբու Ջաֆար ալ-Մանսուրին (750—754): Երբ Աբու-Աբբասը գրավեց խալիֆայական գահը և մի շարք երկրներ, այդ թվում Արմինիայի կառավարիչ նշանակեց իր եղբորը:

Աբու Ջաֆարի նշանակման թվականի մասին աղբյուրները մի քիչ տարբերվում են: Թաբարին (էջ 92) և իբն ալ-Աթիրը (Ե 212) դնում են Հիջրի 132 թ. (մ. թ. 749—750): Յակուբին (էջ 109) դնում է Հիջրի 134 թ. (մ. թ. 751—752), նույնը Տադրիբերդին (Ա 329), հարմարագույնն է վերցնել 750 թ. վերջի, այսինքն Աբու-Աբբասի խալիֆ դառնալու թվականը: Հայ պատմիչներից Ղևոնդը (էջ 158) և Ասողիկը (էջ 131—132) հիշատակում են նրա կառավարիչ նշանակվելն իր եղբոր կողմից, կոչելով նրան «միւս Աբդլլայ», որը իսկապես նրա անունն էլ է:

Ըստ իբն Խալդունի (Գ էջ 174) Ջաֆարը մնաց Արմինիայի կառավարիչ մինչև իր խալիֆայական գահ բարձրանալը (մ. թ. 754) և կառավարեց փոխանորդների միջոցով: Այն բոլոր աղբյուրներում, որտեղ 750 թ. և 754 թ. միջև կառավարիչներ են հիշատակվում, պետք է նկատել իբր փոխ-կառավարիչներ: Այսպես՝

26. Աբդլլահ իբն Մուհամմադը (750), որը Հիջրի 132 թ. (մ. 750) Ջաֆարի կողմից նշանակվեց փոխանորդ (Թաբարի, էջ 92):

27. Սալիհ իբն Սուբայի ալ-Քինդին (751), որին Թաբարին (էջ 92) դնում է Հիջրի 132 թ.: Ղևոնդը (էջ 165) նրան անվանում է «Մալեհ այր անօրէն և արինահեղ» — Սալիհն հեռացվեց Հիջրի 134 թ. (մ. թ. 751—752):

28. Եզիդ իբն-Ուսայդ աւ-Սուլամին (752—754). նրա մասին խոսում են Բելազորի (էջ 62), Յակուբին (էջ 109), իբն ալ-Աթիրը (Ե 211). հիշում են նաև Ղևոնդը (էջ 160), Ասողիկը (էջ 132) և Վարդանը (էջ 75), նրան կոչելով Եզիդ որդի Ուսադայի: Բելազորին նրա մասին ասում է, թե ծանարներին հնազանդեցրեց: Սրա մայրն էր ըստ Բելազորիի (էջ 54) Սիսականի պատրիկի դուստրը, որը 695 թ. Դամասկոս ուղարկված գերյալների մեջ էր: Եզիդը Սահակ Բագրատունուն կարգեց իշխան և Բագրատունիները Աբբասյանների վար-

չական ու հարկային ամենադաժան իշխանության պայմաններում դարձյալ առաջին գծի վրա անցան Հայաստանի քաղաքական կյանքում:

Դրանից առաջ՝ 751 թ. Կոստանտին 5-րդ կայսրը գրավել էր Կարինը, ավերել ու բնակչությանը տեղահան արել դեպի կայսրության հողերը: Եզիզը վերագրավեց Կարինը 752 թ. և տեղահան արված բնակչության պարտավորիչ աշխատանքով վերաշինեց ու ամրացրեց քաղաքը, այնտեղ հաստատելով մահմեդական զինվորական գաղութ, որի պարենը հայերը պիտի հողային (Ղևոնդ, 161):

Սրա ժամանակ արշավեցին խազարները, պարտության մատնելով մահմեդական զորքերին: Անմիջապես հետո ըստ Յակուբիի տեղեկության (էջ 109—110) ծանարներն ապստամբեցին: Նա մնաց իր պաշտոնի մեջ մինչև Հիջրի 136 թ.:

29. Հասան իբն Կահրաբա ադ-Թալիմ (754—759), Հաջորդեց Եզիզին Հիջրի 137 թ. (754—755), Բելազորի (էջ 63), Յակուբի (էջ 109), նա գլխավորապես ուղարկվեց ծանարների ապստամբությունը զսպելու համար: Ըստ Յակուբիի (էջ 109) Կահրաբան իր ուժերը անբավարար զգալով՝ օգնական ուժ խնդրեց Աբու-Ջաֆարից: Նա էլ 20 հազարից բաղկացած բանակ ուղարկեց Ամր իբն Իսմայիլ ալ-Հարթի զորականի հրամանատարության տակ, որը ծանարների դեմ ամենախիստ կռիվ մղեց:

Հասանը շարունակեց կառավարել առանց ընդհատման մինչև Հիջրի 141 թ. (մ. թ. 758—759):

30. Եզիզ իբն Ուսայդ աւ-Սուլամի (759—770) երկրորդ անգամ (Յակուբի, էջ 109), նա հայերի վրա հարկային խիստ բռնություններ գործ դրեց (Ղևոնդ, էջ 166). այնպես որ հայերը բողոքեցին ամիրապետի մոտ, որն ուղարկեց¹.

31. Բաֆառ իբն Մուսլիմ Օֆալիի (770—771) ըստ Արմինիայի և Առանի զրամների արձանագրությանց: Նա արդեն Հիջրի 152 թ. (մ. թ. 770) պետք է կառավարիչ եղած լիներ: Նրա կառավարիչ նշանակելու թվականը դնում են Հիջրի 153 թ. (մ. թ. 771), Թաբարի (էջ 93), Տադրիբերդի (Բ էջ 20), Իսկ Բելազորին (էջ 63) թվական չի տալիս: Ղևոնդը (էջ 167) ասում է, թե նա մնաց մեկ տարի և հետ կանչվեց. նույնը և Վարդան (էջ 75):

32. Հասան իբն Կահրաբա (771—775, երկրորդ անգամ): Սրա անունը կա Հիջրի 154 և 155 թ. (մ. թ. 771—772) զրամների վրա: Նույնի մասին խոսել է

¹ Պատմերը (էջ 11) անորոշություն է ցույց տալիս, մեկնելով զրամադիտական մի տվյալից. س տառը կարող է Սուլամի անվան սկզբնատառը լինել ավելի քան Սեն-Մարտենի ենթադրած Սուլայմանի: Ճիշտ են Ղևոնդի խոսքերը այդ մասին, որն ասում է (էջ 162—163), թե Սուլայմանը պարզապես Վասպուրականի կողմերում մի ասպատակող խմբի հրամանատար էր (Եզիզի ոստիկանության ժամանակ): Հակասություն կա Հովհաննես կաթողիկոսի (էջ 135) ասածի և Ղևոնդի միջև, որ ցույց է տալիս, թե երկուսի հիշած Սուլայմանը միևնույն անձը չէ: Մինչդեռ Ղևոնդն ասում է, թե նա սպանվեց Գադիկ Արծրունուց՝ Վասպուրականի տիրապետության համար Արծրունիների մղած համառ կռիվների ընթացքում, Հովհաննես կաթողիկոսն ասում է, թե այդ Սուլայմանը հետագայում դարձավ ոստիկան Դվինում և Սիոն Բավնաջուն կաթողիկոս նշանակել տվեց: Սիոնը նշանակվեց 767 թ., որը ճիշտ համընկնում է Եզիզի երկրորդ պաշտոնավարության շրջանին: Հետևաբար Հովհաննես կաթողիկոսի հիշատակած Սիմոն նահանգի կառավարիչ Սուլայմանը՝ Եզիզ Սուլամին է:

և Ղևոնդը (էջ 168): Նա իր հետ բերեց հորասանից արաբական զորագնդեր և ծայրահեղ խստություններ ու հարկային բռնություններ էր գործադրում:

Կահթաբայի ոստիկանության ժամանակ տեղի ունեցավ համաժողովրդական ապստամբություն նախ Արտավազդի, ապա Մուշեղ Մամիկոնյանի գլխավորությամբ: Այդ ապստամբության մասին ակնարկում են արաբ աղբյուրները Հիջրի 158 թվի (մ. թ. 774—775) տակ: Այսպես Բելազորին (էջ 63), Յակուբին (էջ 110), Խարարին (էջ 93): Իսկ Ղևոնդն (էջ 168—181) և Վարդանը (էջ 75) խոսել են մանրամասն: Ապստամբությանը միացան գրեթե բոլոր նախարարական տները, որոնց մեջ և սպարապետ Սմրատ Բագրատունին, բայց հետո Արծրունիներն իրենց վասալներով ու Աշոտ Բագրատունին մեկուսացան, որով շարժումը թուլացավ և Ամր զորավարի հրամանի տակ (Բելազորի, էջ 63), հորասանյան նոր օժանդակ գնդերը զինական մեծ պատրաստությամբ հասան և մի շարք կռիվներից հետո 775 թ. (օրինակ, Արճեշում ապրիլի 15-ին, Բագրևանդի մոտ Արծն գյուղում ապրիլի 24-ին)¹ մեծ կորուստներ տալուց հետո, հայերի ապստամբությունը ընկճվեց:

Այդ աղետից հետո էլ ավելի ծանրացավ արաբական լուծր Հայաստանի վրա, արաբ բնակչությունը շատացավ, էմիրները զորացան ի վնաս հայ նախարարական տների: Հատկապես տուժեցին Մամիկոնյանները: Նրանք փաստորեն քաղաքական ասպարեզից չքացան, նրանց կալվածները մասամբ անցան Ջահարյաններին, իսկ Բագրատունիները ժամանակավոր նահանջից հետո նորից գերակայություն ձեռք բերեցին: Այնուհետև Դավիթն ու Մանազկերտը դարձան արաբական առաջնակարգ դիրքեր: Այդ տեղերից նրանց չկարողացան արտաքսել ոչ Բագրատունիներն ու ոչ էլ Արծրունիները, նույնիսկ իրենց ամենագորեղ շրջանում:

33. Վաղիհ (775):

Սրա մասին խոսել է միայն Յակուբին (էջ 110), որի նախապապն է եղել հիշյալ Վաղիհը: Ըստ նույն պատմագրի, նա պաշտոնում մնաց կարճ ժամանակ միայն, մինչև Արու-Ջաֆար խալիֆի մահը: Վերջինս մահացավ Հիջրի 158 թ. Զուհիջջա ամսի վերջից 6 օր առաջ (մ. թ. 24 հոկտեմբեր, 775 թ.):

Հաջորդ խալիֆ ալ-Մահդիի (775—785) կողմից նշանակված կառավարիչների մասին խոսող պատմիչները որոշ թվական չեն նշել, բայց կարելի է դետեղել նրանց հետևյալ կարգով.

34. Եզիդ իբն Ուսայդ (775—780, երկրորդ անգամ, Հիջրի 159 թ. մ. թ. 775—776): Դավիթ դիրհեմները Եզիդի անվամբ են, ինչպես և 163 թ. (779—780) Պարտավի դրամները. ուստի նրա պաշտոնավարությունը տևում է մինչև 780 թ. սկիզբը: Իրն ալ-Աթիրը (Ձ 24) ասում է, թե Հիջրի 162 թվին (մ. թ. 778—779) Արմինիայի բանակներին հրամայում էր Եզիդը: Նրա մասին խոսում է նաև Ղևոնդը (էջ 186):

35. Հառուն (780—786):

Ալ-Մահդի խալիֆը Հիջրի 163 թվին (մ. թ. 779—780) իր որդուն նշանակեց ամբողջ արևմուտքի (որի մեջ էր նաև Արմինիան) կառավարիչ. Թաբարի (էջ 93), իրն հալդուն (Գ 212), Տաղրիբերդի (Բ 45): Նա, ըստ իրն ալ-Աթիրի (Ձ 25), Հայաստանում գործերի վարիչ, կամ փոխանորդ նշանակեց.

¹ Տես Ն. Մանանդյան, Ժողովրդական ապստամբությունները Հայաստանում արաբական տիրապետության դեմ, Երևան, 1939, էջ 18—19:

36. Յանիա իբն հալիդ ալ-Բարմաֆիին, որը վարեց գործերը մինչև Հարունի գահ բարձրանալը 780 թ.:

37. Օբման իբն Օմարա իբն հուրայմի (781—785): Սրա սլաշտոնավարության մասին գրել է Բելազորին (էջ 63) առանց թվականը ճշտելու, բայց նրա անվամբ Հայաստանում և Առանում կտրված դրամներ կան Հիշրի 167 և 168 (մ. թ. 783—785): Մյուս կողմից՝ Ղևոնդն ասում է, թե (էջ 193) Օթմանը կառավարիչ էր, երբ Հայաստան իբրև իշխան ուղարկվեց Տաճատ Անձևացին, իսկ Տաճատը փախել էր Բյուզանդիայից 781 թ.: Հարունի արշավանքի ժամանակ:

38. Ռաուհ իբն Հատիմ ալ-Մուհալլաբի (785—786): Սրա սլաշտոնավարության մասին հիշատակել է Բելազորին (էջ 63): Ղևոնդը (էջ 191) գրում է, թե Մահդին մահացավ «ընդ գալն Ռոհայ»: Մահդիի մահվան թվականն է Հիշրի 169 թ. Մուհարրամ ամսի 22 (մ. թ. 4 հուլիսի 785 թ.):

39. Խուզայմա իբն խազիմ Ադ-Տամիմին (786—787): Նրան կառավարիչ նշանակեց Ռաշիդը, երբ գահ բարձրացավ (786 թ.), ինչպես վկայում են Բելազորին (էջ 63) և Յակուբին (էջ 110): Նա կառավարեց մեկ տարի և երկու ամիս՝ ըստ Բելազորու: Խուզայմայի ժամանակ խալիֆաթի բռնակալ տիրապետությունը Հայաստանի վրա ավելի շեշտվեց. նա նորոգեց Դվին—Նախիջևան ռազմական ճանապարհը: Ըստ Ղևոնդի Մուսա ալ-Հադին (785—786) էր, որ կառավարիչ նշանակեց հազմին «ըստ անուանն իւրոյ խազմարար և զժոխածն» (էջ 195):

40. Յուսուֆ իբն Ռաշիդ աւ-Սուլամի (787), ըստ Յակուբի (էջ 110) նա սլաշտոնի կոչվեց Հիշրի 170 թ. (մ. թ. 786—787): Սա Նիզարի ցեղախմբերից փոխադրեց ու բնակեցրեց Հայաստանում և երկիրն ավելի ենթարկեց արաբական լծին:

41. Եզիդ-իբն Մազյադ իբն-Ջալդա աշ-Շայբանի (787—788): Սա էլ արաբական բնակչության թիվն ավելացնելու քաղաքականություն վարեց՝ Հայաստան բերելով Ռարի'ա ցեղից բնակիչներ: Սրա մասին խոսում են Բելազորին (էջ 63) և Յակուբին (էջ 111): Իսկ ըստ իրն հալիֆանի (Գ 297) վկայության, նա սլաշտոնից հեռացվեց Հիշրի 172 թ.: Նրա մասին խոսում է նաև իբն ալ-Աթիրը (Զ 48):

42. Օրայդուլահ իբն ալ-Մահդի (788—790): Սրա անունով դրամներ կան Հիշրի 172—173 և 174 թվերով (մ. թ. 788—789—790): Սրա մասին խոսել են Բելազորին (էջ 63), Բարարին (էջ 94), իրն ալ-Աթիրը (Զ 48), իբն հալդունը (Գ 215), Տադրիբերդին (Բ էջ 70): Օրայդուլահի կապակցությամբ Ղևոնդը (էջ 200) նշում է, թե նա կեղեքիչ և հարկասլահանջ էր (տես նաև Ասողիկ, էջ 133—134), նա փոխանորդ նշանակեց:

43. Սուլայմանին (788—790), որի մասին արաբ աղբյուրները չեն խոսում, իսկ Ղևոնդը (էջ 200—203) տեղեկություն է տալիս, սակայն զնում է նրան Աբուլքաբիբից հետո. Ղևոնդը ասում է, թե Օրայդուլահը ինքն անձամբ եկավ և սրան հաստատեց Պարտավում, իսկ Սուլայմանը սարսափելի հարկային խնդիրներով դիմեց իր փեսայի՝ իրն Տոկեսի միջոցով: Նրա ժամանակ մահացած լինելով Եսայի Եղիսլատրուշեցի կաթողիկոսը (Ղևոնդ, էջ 203), (Սամվել Անեցի, էջ 89) նրա կառավարչության շրջանը այսպիսով ստուգվում է:

44. Աբուլֆաբի իբն Աբդուլ Համիդ Զալդ իբն ալ-Խալաբ ալ-Աղալի (791): Սրա մասին հիշում են Յակուբին (էջ 111) և Ղևոնդը (էջ 200 «Արդալ-րիբ»), որն ասում է «ոչ լարի ինչ գործեաց և ոչ շար. այլ զկարծիս լաւ իմն

ցուցանէր», Նա մնաց միայն շորս ամիս: Հետեւելով իր նախորդների քաղաքականութեան, Ռաբի'ա ցեղից բնակիչներ բերեց և հաստատեց Հայաստանում:

45. Ֆադլ իբն Յահիա իբն Խալիդ ալ-Բաւմաֆի (792—794):

Սա նշանակվեց Հիշրի 176 թ. (մ.թ. 792—793) ըստ Բելազորու (էջ 63), Յակուբի (էջ 111) և Թաբարի (էջ 94) վկայություններին: Ֆադլի անունը գտնվում է Հիշրի 175 թ. (մ. թ. 791—792) դրամների վրա (Յասմեր, էջ 32): Նրա պաշտոնի սկզբնավորության թվականը պետք է ճշտել համաձայնեցնելով երկու տվյալները: Նա պետք է պաշտոնավարած լիներ մինչև իր նորաստան գնալը Հիշրի 177 կամ 178 թ. (մ.թ. 793—795), Համենայն դեպս նա անձամբ ղեկավարեց, այլ համաձայն Յակուբիի տեղեկության նշանակեց փոխանորդներ, որոնք կարճատև պաշտոնավարություն ունեցան:

46. Օմար իբն Այուբ ալ-Քինանի (792—793), որին Ֆադլը փոխանորդ էր կարգել (Յակուբի, էջ 111):

47. Աբու Սաբահը և միաժամանակ Սայիդ իբն Մուհամմադ ալ-Հաւանի ալ-Լահբին (793 թ.) նույնպես Ֆադլի փոխանորդներ էին, երբ նա գնաց Իրաք (Յակուբի, էջ 111), առաջինը տուրքերի վերականգու էր, իսկ երկրորդը բանակների հրամանատար: Ըստ Յակուբիի Աբու Սաբահի դեմ ապստամբեցին Պարտավի բնակիչները և սպանեցին նրան, իսկ Հայաստանում խառնակություն ծագեց և երևան եկավ Մուսլիմ ալ-Շարի աղանդավորը և հաստատվեց Քիլաբ ամրոցում:

48. Խալիդ իբն Եգիդ իբն Ուսայդ աւ-Սուլամի (794) ըստ Յակուբիի (էջ 111): Ապա Յակուբին տալիս է մի շարք ոստիկանների անուններ, առանց թվականները ճշտելու, որոնց պաշտոնավարությունը տևում է մինչև 798 թվականը: Սրանք են.

49. Աբբաս իբն ալ-Ջաւիհ իբն Եգիդ իբն Ջաւիհ իբն Աբդալահ ալ-Բաւալի (794) ըստ Յակուբիի (էջ 112), որի ժամանակ բայլականցիների ըմբոստությունը շարունակվեց և նրան պաշարեցին Պարտավում: Ապստամբներին զսպելու համար խալիֆն ուղարկեց Հարաշիին և Եղիգիին մեծ ուժերով: Խոսքը այստեղ պարսիկ աղանդավորների մեծ ապստամբության մասին է Ատա ալ-Մուկաննաի (Աբու Մսլիմ կոչված) գլխավորությամբ: Այդ ապստամբությունը, ինչպես նշում է Յակուբին, ծառայեց Հայաստանի ուժը զորեղացնելուն:

50. Մուսա իբն Իսա ալ-Հաշիմի (794—795):

Սրա անվամբ առանական դրամ կա Հիշրի 178 (794—795) թվով, նա պաշտոնավարեց մեկ տարի ըստ Յակուբիի (էջ 112): Բայց ստույգ է, որ նա 795 թ. Եգիպտոսի կառավարիչ նշանակվեց: Այս ոստիկանը Մսլիմի խոռվությունը ղեկարդացավ զսպել, որով Ռաշիդը ուղարկեց.

51. Յահիա ալ-Հաւաշիին (795—796): Սրա անվամբ էլ դրամ կա Հիշրի 179 թ. (795—796). նա մահ տարածեց ապստամբների մեջ:

52. Ահմադ իբն Եգիդ իբն Ուսայդ աւ-Սուլամի (796—797): Յակուբին (էջ 112) նշում է նրա պաշտոնավարությունը Հիշրի 179—181 թթ.:

53. Սայիդ իբն Սալմ իբն Քուտայբա ալ-Բահիլի (798—799), որը ըստ Ռաբարիի (էջ 94) արդեն կառավարում է Հիշրի 182 թ. (մ. թ. 798—799). Յակուբին (էջ 113) խոսում է նրա մասին: Նրա անվան հանդիպում ենք Հիշրի 181 և 182 թվերի դրամների վրա: Իբն Խալիքանը (Բ 180) խոսում է

նրա մասին, ասելով, թե նա, բացի Արմինիայից, մի շարք վայրերի կառավարչի պաշտոն վարեց հաջորդաբար (առանց հիշելու թվականը) և մեռավ Հիշրի 217 թ.:

54. Նասր իբն Հաբիբ ալ-Մուհալլաբին (799): Սրա մասին խոսում է Յակուբին (էջ 114):

55. Ալի իբն Իսա իբն Մահան (799), որի մասին խոսում է դարձյալ Յակուբին (էջ 114): Սրա դեմ ելավ Շիրվանի ժողովուրդը:

56. Եզիդ իբն Մազյադ աշ-Շալբանի (799—801, երկրորդ անգամ), սրա մասին խոսում են Յակուբին (էջ 114), իբն ալ-Աթիրը (Ձ 65) Հիշրի 183 թ. տակ, իսկ Թաբարին (էջ 94) դնում է նրա պաշտոնավարությանը Հիշրի 184 թ.: Նրա անունով կան առանակաձև դրամներ Հիշրի 183 և 184 թթ. և 185 թվի Հայաստանի դրամներ (Ֆասմեր, էջ 39). նա 799 թ. հետ մղեց խազարներին Հայաստանի սահմաններից: Մահացավ 801 թ.:

57. Ասադ իբն Եզիդ իբն Մազյադ աշ-Շալբանի (801—802). սրա մասին խոսել են Թաբարին (էջ 94) և իբն Աթիրը (Ձ 85): Նրա անունը կա Հայաստանի և Առանի դրամների վրա Հիշրի 185 և 186 թվականներով (մ.թ. 801—802): Այդ թվից մինչև Հարուն խալիֆի մահը (մ.թ. 809) կառավարեցին.

58. Մուհամմադ իբն Եզիդ իբն Մազյադ (802—803): Սրա մասին խոսել են Յակուբին (էջ 114) առանց թվականը ճշտելու, Բելազորին (էջ 63) և իբն Խալիֆանը. նրա անունով դրամներ կան Հիշրի 186 և 187 թթ. (մ.թ. 802—803):

59. Խուզայմա իբն Խազիմ ադ-Տամիմի (803—806), որի մասին խոսել են Յակուբին (էջ 114) և Բելազորին Հիշրի 187 թ. (մ.թ. 803) տակ: Բայց որովհետև նրա անունով դրամ կա Հիշրի 187 թվից մինչև 191 թ. (մ.թ. 806—807), նրա իշխանության տևողությունը այդքան պետք է լինի, հակառակ Յակուբիի, որն ասում է, թե մի տարուց պակաս մնաց: Նա էր, որ ըստ Բելազորիի Դվինից Նախիջևան գինվորական ճանապարհը բացեց, որն առաջ չկար: Ըստ Յակուբիի հայ մեծամեծներին գլխատեց և ահավոր շարիքներ հասցրեց նրանց: Իր դեմ ապստամբեցին վրացիք և ծանարները: Վրացիների դեմ ուղարկեց Սալիդ իբն ալ-Հարթամ իբն Շոբա իբն Ջահիր ադ-Տամիմին մեծ բանակով: Սակավեց վրացիների և ծանարների դեմ և վերջիններին վտարեց երկրից ու հասավ մինչև Թիֆլիս:

60. Սուլայման իբն Եզիդ իբն Ասամ ալ-Ամիրի (806—807), որին Յակուբին (էջ 114) կոչում է զառամյալ ծերունի: Սրա անունով առանակաձև դրամ կա Հիշրի 192 (մ.թ. 807) թ.:

61. Ալ-Աբբաս իբն Ջուֆար ալ-Հիլալի (807), որի մասին հիշատակում է Յակուբին (էջ 115). նրա դեմ ապստամբեցին ծանարները և նեղ դրուժյան մատնեցին, որով Ռաշիդն ուղարկեց.

62. Յահիա իբն Ջուֆար կամ Ջուհայր (808). այս անձի մասին պատմիչների մոտ ոչ մի հիշատակություն չկա, բայց նրա անվամբ դրամ կա Հիշրի 193 թ. (մ.թ. 808—809): Ֆասմերը (էջ 44) սրան դնում է հաջորդից հետո. ըստ իս սխալմամբ:

63. Մուհամմադ իբն Ջահիր կամ Ջուհայր իբն Մուսայիդ ադ-Դաբբի (809), որի մասին խոսում է Յակուբին (էջ 115), թե նա եղավ Ռաշիդի կողմից նշանակված վերջին կառավարիչը:

64. Ասադ իբն Եզիդ իբն Մազյադ (809—811): Յակուբին (էջ 115) ասում է, թե նա նշանակվեց ալ-Ամին խալիֆի կողմից: Ուրեմն նրա պաշտոն-

նավարությունը սկսվում է 809 թ. օգոստոսից հետո: Նրա անվամբ գրամներ կան Հիշրի 193 և 194 թթ. (մ. թ. 809—810—811): Յակուբին տեղեկացնում է, թե խալիֆը նրան հեռացրեց պաշտոնից, բայց չի շեշտում թվականը, որովհետև երկրում խռովություններ կային, իսկ Ասադը մեղմությամբ էր վարվում ապստամբների հետ: Նա մահացավ Հիշրի 195 թ. (մ.թ. 810—811):

65. Իսկակ իբն Սուլայման ալ-Հաշիմի (811—813), որն անձամբ չեկավ, այլ ուղարկեց իր ուրդուն: Ֆասմերը (էջ 55) նշում է, թե Հիշրի 195 թ. (մ. թ. 810—811) դրամի վրա կա Ահմադ իբն Եզիդի անունը. նույնը, որ 795—796 թթ. ոստիկան էր (№ 50): Թեև պատմական կարգից դուրս է նա, բայց կարելի է նկատի ունենալ նրան, եթե միայն դրամական արձանագրության ընթերցման շփոթություն չկա:

66. Ֆադլ (811—813), իբրև տեղապահ հաջորդեց իր հորը, Յակուբի (էջ 111): Հիշրի 196 թ. (մ. թ. 811—812) առանական դրամների վրա կա Իսհակ իբն Սուլայմանի անունը: Ֆադլի պաշտոնավարությունը պետք է տևած լինի մինչև 813 թվականը, որովհետև այդ թվին, այսինքն Հիշրի 198 թ., ինչպես ասում է Յակուբին (էջ 115), Հայաստանը գտնվում էր արդեն ապստամբ Աբդլմալիք իբն Ջահաֆ Սուլամիի և Մուհամմադ իբն Իդարի ձեռքում: Հարոնի մահից հետո խալիֆայական նահանգների մեջ տարածված երկպառակությունները արձագանք գտան նաև Հայաստանի արաբների մոտ: Մանազկերտում ամրացած Կայսիկ Ջահաֆ էմիրը, որը Բագրևանդի կովից հետո տիրացել էր Արշարունիքին և իր դիրքն ամրացրել էր ամուսնանալով Մամիկոնյան իշխանուհու հետ, փորձում էր գրավել նաև Կամսարականների կալվածները: Այս առթիվ էր, որ վերջիններս Շիրակը վաճառեցին Աշոտ Մսակերին: Հարունը Հայաստանի մահմեդական ապստամբ էմիրներին հակադրելու համար սկսեց նպաստավորել Բագրատունիներին և 806 թ. Աշոտ Մսակերին նշանակեց Հայաստանի իշխան: Նա կովեց ապստամբների դեմ և Ջահաֆից գրավեց Արշարունիքի մի մասը և ուրիշ վայրեր (Վարդան, 78—79): Մուհամմադ իբն Հազարը (Իգար) Թիֆլիսի էմիրն էր, որ ծանարների և Կախեթի մթավարիի օգնությամբ ապստամբեց խալիֆի դեմ: Այս ապստամբությունը մի պահ զսպեց Աշոտ Կյուրապաղատը:

67. Թահիր իբն Մուհամմադ աս-Սանանի (813):

Նրան պաշտոնի կոչեց Ալ-Մամուն խալիֆը, երբ իշխանության գլուխ անցավ (813 թ. հոկտեմբերից): Յակուբին ասում է, թե (էջ 115—116) նա կովեց Իսհակ իբն Սուլայման ոստիկանի դեմ, որն Ալ-Ամինի կողմնակիցներից էր և որին օգնում էին Առանի իշխան Աբդ էլ-Ռահմանը (Վարազտրդատ), Ներսեսը և ուրիշները (جماعة من البطارقة و نرسی و عبدالرحمن بطريق الران): Թահիրի անվամբ կան առանական դրամներ Հիշրի 196 և 197 թթ. (մ.թ. 811—812—813), ըստ Ֆասմերի (էջ 56): Թահիրի ժամանակ ապստամբություններ ծավալվեցին և նա պաշարվեց Պարտավում: Մամունն ուղարկեց Սուլայմանին (ըստ Յակուբիի) կամ Խալիդին (ըստ Բելազորու) նույն տարում իբրև կառավարիչ: Այս մեկ տարվա պատմագրական և դրամագիտական տվյալները մի քիչ շփոթ են, այնպես որ դժվար է խիստ կարճատև պաշտոնավարություն ունեցող կառավարիչների հաջորդականության շարքը ճշտել. մոտավորապես կարելի է նրանց դասել հետևյալ կերպ.

68. Խալիդ իբն Եզիդ իբն Մազլադ ալ-Շալբանի (813), որը նշանակ-

վեց Մամունի կողմից, ըստ Բելազորիի (էջ 63): Սա հայ իշխաններից ընդունում էր ընծաներ և նրանց հետ քարեկամությունը էր վարվում:

69. Աբղիմալիի իբն Ջահաֆ աս-Սուլամին (813 թ.), որի անունը Հիջրի 196 և 197 թթ. (մ. թ. 812—813) դրամների վրա կա և որի մասին Աբդլլահ անվամբ խոսում է Վարդանը (էջ 77) իբրև ապստամբ և իշխանություն բռնագրավող, Կայսյան (Կայսիկ) այդ էմիրների գործունեությունը տևում է 8-րդ դարի վերջից մինչև 813 թ. Ջահաբի ապստամբությունը և 813—820 թթ. նրա որդու Աբդլմալիիի և 820—823 Սևազայի գործունեությունը: Սրանց ծավալողականության դեմ արգելք եղան Բագրատունիները համառ կռիվ մղելով:

70. Սուլայման իբն Ահմադ իբն Սուլայման ալ-Հաշիմի (813), որը եկավ զսպելու ապստամբությունը (Յակուբի, էջ 116): Սրա անվամբ առանական դրամներ կան Հիջրի 197 թ. (մ. թ. 813):

71. Ալ-Աբբաս իբն Զուֆար ալ-Հիլալի (813, երկրորդ անգամ), որն ուղարկվում է հավանաբար Սուլայմանին հաջորդելու: Սրա անունը կա Հիջրի 197 թ. դրամների վրա:

72. Աբու Աբդալլահ (814): Այս ոստիկանը ծանոթ է միայն Հիջրի 198 թ. իր անունը կրող դրամներով (Յասմեր, էջ 59):

73. Հատիմ իբն Հաբամա իբն Այան (817—818), որը Հայաստան դալուց մի քանի օր հետո լսեց իր հոր Հարթամայի՝ Մամունի կողմից սպանման լուրը և միացավ ապստամբներին (Յակուբի, էջ 116—117), Վեյլը Weil, Բ, էջ 298, իրն ալ-Խութայրայից առնելով նշում է, թե Բարեկը այդ առթիվ տիրացավ Աղրբեջանին, Բարեկի ամրացմանը նպաստեց նաև Սյունյաց Վասակ իշխանը, որ 821 թ. Սևազայի հարձակումներից պաշտպանվելու համար, հրավիրեց Բարեկին: Վերջինս հաջորդ տարին, Վասակ իշխանի մահից հետո ամուսնացավ նրա աղջկա հետ (Կադանկատվացի, էջ 374—375): Բելազորին գրում է (էջ 63), թե Հայաստանի իշխանները նստած էին իրենց երկրներում և նրանցից ամեն մեկը պաշտպանում էր իր դավառը, Երբ այստեղ էր գալիս ամիրապետի ոստիկանը, նրանք ջանում էին նրան սիրաշահել: Եթե նա նրանց հետ աղնիվ, բայց խիստ վարվե՞ր՝ նրանք հարկ էին վճարում, հակառակ դեպքում նրան հրապարակով հայհոյում էին ու արհամարհում նրա հրամանը:

Հատիմի անվամբ դրամներ կան Հիջրի 201—203 թթ., որից հետևում է թե նա փաստորեն պահել է իշխանությունը մինչև 818 թ.:

74. Յահիա իբն Մուադ իբն Մուսլիմ (818—820): Ըստ Յակուբիի հիշատակության (էջ 117) նա անհաջող կռիվ մղեց Բարեկի դեմ, որից զոհո՞ւ մնալով խալիֆը նրա փոխարենն ուղարկեց:

75. Բսա իբն Մուհամմադ Աբու-Խալիդին (820—823), որի պաշտոնավարությունն սկսվում է Հիջրի 205 թ. (Յակուբի, էջ 117, Թարարի էջ 94, իրն ալ-Աթիր, Զ 149, Տավրիերդի, Բ 179),— նրա անվամբ դրամներ կան Հիջրի 207 կամ 822 մ.թ. (Յասմեր, էջ 65):

76. Մուհամմադ իբն Աբդալլահ Ալ-Քալբի (823), որին պատմագիրները չեն հիշատակում, բայց իր անվամբ դրամ կա Արմինիայի և Առանի 205 և 207 թթ. մ. թ. 822—823 (Յասմեր, էջ 65):

77. Զուրադի իբն Ալի իբն Սադակա ալ-Ազլի (825), որի մասին գրել են Յակուբին (էջ 117—118), Թարարին (էջ 94—95), իրն ալ-Աթիրը (Զ 159), Տադրիերդին (Բ էջ 187). իր անվամբ առանական դրամ կա Հիջրի 208 և 209 թթ.

(823—824), նա հազիվ մեկ տարի մնաց, երբ պաշտոնանկ եղավ և ապստամբեց խալիֆի դեմ:

78. Աբդլ-Ալա իբն Ասադը (825—826), որի մասին պատմիչները ոչինչ չեն ասում, բայց իր անվամբ դրամ կա Հիջրի 210—211 թթ. (Ֆասմեր, 67) (մ. թ. 825—826):

79. Մուհամմադ իբն Հումայդու ադ-Թուսի (827—829). նրա պաշտոնավարության տարբեր թվականներ են տալիս պատմիչները: Յակուբին (էջ 117) թվական չի տալիս. իբն ալ-Աթիրը (Ձ 165) դնում է Հիջրի 211 թ. (մ. թ. 826), իսկ Տադրիբերդին (Բ 203) Հիջրի 212 թ. (մ. թ. 827): Նա մի շարք պարտություններ կրեց Բաբելից և ի վերջո սպանվեց: Կաղանկատվացին (էջ 375) նրա պաշտոնի տևողությունը դնում է երկու տարի: «Եւ յետ երկուց ամաց եհար Բաբան զՏաուսին և հալածական արար անձինս իբրու երկու հարիւր և յիսուն հազար», Այդ լինում է հայոց 276 թ. (մ. թ. 827) երկու տարի վերջ, այսինքն՝ 829 թ., որը համապատասխանում է նաև արաբ հեղինակների տվյալներին, որովհետև Հումայդայի սպանման թվականը դնում են Հիջրի 214 թ. (մ. թ. 829), Յակուբին (էջ 118), իբն ալ-Աթիրը (Ձ 168), Տադրիբերդին (Բ 209):

80. Աբդալլահ իբն Թահիր (829): Նրա մասին խոսում են Յակուբին (էջ 118), իբն ալ-Աթիրը (Ձ 169): Ըստ իբն իսախանի տեղեկության, նա հեռվից՝ Խորասանից ղեկավարեց Բաբելի դեմ պատերազմը տեղակալների միջոցով: Բայց իբն ալ-Աթիրի տեղեկությունից հետևում է, որ նա մինչև իր Խորասան մեկնելը Խարիջի ապստամբների դեմ կռվելու համար կարճ ժամանակով մնաց Հայաստանում: Նրա մահից հետո, ըստ Յակուբիի վկայության, մինչև Մամուն խալիֆի մահը (833) հետևյալ կառավարիչները նշանակվեցին.

81. Աբդլ-Ալա իբն Ահմադ իբն Եզիդ իբն Ուսայդ աս-Սուլամի (829, երկրորդ անգամ): Յակուբին (էջ 118) չի ճշտում թվականը, ասում է միայն, թե նա անկարող եղավ կառավարել և ապստամբ իրն Ատտաբից պարտվելով՝ ստիպված եղավ փախչել: Նրա դեմ ելան նաև ժանարները: Նրա փոխարեն նշանակվեց.

82. Խալիդ իբն Եզիդ իբն Մազյադ աշ-Շալբանին (829—832, երկրորդ անգամ): Նրան հաջողվեց հպատակեցնել ապստամբներին: Նա էր, որ Ալի իբն Շուայբին Թիֆլիսի կառավարիչ նշանակեց (Brosset — Histoire de la Georgie, I, 265): Աշոտ Կյուրապաղատը Խալիդ ոստիկանի հետ դժտվեց մի պահ: Իր մահից հետո էր, որ Խալիդ տստիկանը Ալի իբն Շուայբին նշանակեց Թիֆլիսի էմիր: Խալիֆի դեմ ապստամբեցին Մանազկերտի կայսիցիք (Ջահաֆյան Սևադան) Ալի իբն Յահյայի մասնակցությամբ: Ոստիկանը զսպեց այդ շարժումն էլ (Յակուբի, 118): Երբ ոստիկանը հալածվեց, Սևադան նրան դիմավորեց և նա ներում շնորհեց: Խալիդի անվամբ դեռ Հիջրի 212 թվից (մ. թ. 827) առանական դրամներ կան, ապա մինչև Հիջրի 217 թ. (մ. թ. 832) դրամների վրա (Ֆասմեր, էջ 73), որով ճշտվում է նրա կառավարության թվականը: Խալիդը հիշատակվում է հայ պատմիչներից «Հօլ» անվամբ (Հովհ. կաթ. 145—146, Օրբելյան, էջ 157). Կաղանկատուցին հիշում է որպես խազը փառգոս (էջ 378) առավելապես նրա 3-րդ պաշտոնավարության առթիվ (844 թ.): Հովհայս երկրորդ պաշտոնավարության միջոցին էր, որ տեղի ունեցավ Հրազդանի ափի վրա Կավակերտի կոթվը մի կորմից արաբ ոստիկանի և մյուս կողմից Սմբատ սպարապետի, Սահակ Սյունյաց իշխանի և Սևադա Ջահաբյան էմիրի

միացյալ ուժերի միջև 832 թ., քանի որ ըստ Հովհ. կաթողիկոսի (էջ 146) այդ դեպքից անմիջապես հետո մահացավ Դավիթ Կակաղեցի կաթողիկոսը (833):

83. Աբղալլան իբն Մասադ ալ-Ազդի (832). շատ կարճ ժամանակի համար միայն, ինչպես ասում է Յակուբին (էջ 119). նրա մահից հետո հաջորդեց իր որդին:

84. Ալի իբն Աբղալլանը (832), որի մասին հիշատակում է Յակուբին (էջ 119): Երկիրը հուզված դրություն մեջ լինելով նա շուտով հեռացվեց և ճորտ փոխարեն նշանակվեց:

85. Աբդլ-Ռահման իբն Խական (833): Սրա մասին պատմիչները ոչինչ չեն ասում: Նա ծանոթ է այդ թվի իր անվամբ Արմինիայում գրողված դրամից (Ֆասմեր, էջ 78): Նա էլ շատ կարճ ժամանակ մնաց:

86. Հասան իբն Ալի ալ-Բադդիսի (833—835). ըստ Յակուբի (էջ 119) նրան նշանակեց Մամուն խալիֆը, իսկ ըստ Բելազորի (էջ 64) Մու՛ տասիմը: Համենայն դեպս նրա պաշտոնավարության թվականը (833 թ.) երկու կերպով էլ կարողարանա: Սա պետք է լինի Կաղանկատուացու (էջ 378) հիշատակված «Բադդի ամիրան»: Այդ ոստիկանի անունը գտնում ենք Հիշրի 220 թ. (մ.թ. 835) առանձնական դրամների վրա: Բաբեկի ծավալվող շարժման դեմ Մու՛ տասիմի կողմից մեծ ուժերով ուղարկվեց:

87. Աֆշին Հայդար իբն Քաուսո (835—837). ըստ արաբական աղբյուրների Հիշրի 220 թվին նշանակվեց, Թարարի (էջ 95), իրն ալ-Աթիր (Ջ 182), Տաղրի-բերդի (Բ 232), իրն Խալիֆան: Նա կռվեց և հաղթեց Բաբեկին (Իրն Խալդուն, Գ 259—261, Յակուբի, էջ 119) և գերի վերցնելով նրան Սահլ Սմբատյանի օժանդակությամբ վերադարձավ Սամառա: Նրա եկած ժամանակ Սահլ Սմբատյանը Առանի մեջ ապստամբվել և երկրին տիրացել էր, երբ Մուհամմադը գնաց նրա վրա: Սահլը հաղթեց նրան: Թվում է, թե Աֆշինը թույլ տվեց Սահլին պահել իր իշխանությունը, փոխարենը ստանալով նրա աջակցությունը Բաբեկի դեմ:

Աֆշինը փոխանորդ նշանակել էր իր գալու ժամանակ

88. Մուհամմադ իբն Սուլայման ալ-Ազդի ալ-Սամառկանդին (835—837): Ըստ Յակուբի (էջ 120) Հիշրի 223 թ. նշանակվեց: Ապա նշանակվեց:

89. Մուհամմադ իբն Խալիդ Բուխարա Խոդան (839), դարձյալ Աֆշինի կողմից, ըստ Յակուբի (էջ 120): Ապա նրան հաջորդեց:

90. Ալի իբն Հուսայն իբն Սիբայ, Կայսիկը (840), որին ժողովուրդը «որր» էր անվանում (Յակուբի 120) իր թուլության համար:

91. Խալիդ իբն Եզիդ իբն Մագլադ աշ-Շայբանի (841, երրորդ անգամ): Նշանակվեց Մու՛ տասիմ խալիֆի կողմից (Յակուբի, էջ 120), բայց որովհետև ճորտ գալուստը երկրի մեջ ապստամբություն էր առաջացրել, Մու՛ տասիմը հետ կանչեց նրան և նշանակեց:

92. Ալի իբն Հուսայնին (841, երկրորդ անգամ): Սրա դեմ ապստամբեցին իր գնդերը (Յակուբի, էջ 120), որով խալիֆն ուղարկեց:

93. Հումայդա (կամ Համդոյ) իբն Ալի իբն Ֆադլին (841), ըստ Յակուբի (էջ 121): Այս բոլորը ըստ Յակուբի վկայության տեղի է ունենում Մու՛ տասիմի խալիֆայության շրջանում (833 թ. մինչև 842 թ. հունվարի 16-ը) և որովհետև Յակուբին նրանց յուրաքանչյուրի պաշտոնի ստույգ թվականը չի տալիս, իսկ մյուս արաբ հեղինակներն էլ սրանց մասին չեն խոսել, մնում էր մոտավորապես գետեղել նրանց ըստ հարակից պատմական դեպքերի՝ սկսելով

Աֆշինի մեկնման ստույգ թվականից (837 թ.) մինչև 842 թ. այսինքն 4 տարիների ընթացքում:

94. Խալիդ իբն Եզիդ իբն Մազյադ աշ-Շալբանի (842—845, շորորոդ անգամ):

Սա ուղարկվեց Վաթիկ խալիֆի կողմից մի բանակով, նրան հաջողվեց ժամանակավորապես ղսպել ապստամբ մահմեդական տարրերը (Յակուբի, էջ 131), բայց Հիշրի 230 թ. (մ.թ. 844—845) կրկին ապստամբություն բռնկվեց և նա կրկին ուղևորվեց դեպի Հայաստան և մահացավ Հիշրի 230 թ. և թաղվեց Հայաստանի Դաբիլ (Դվին) քաղաքում: Ըստ Յակուբիի և իբն Խալիքանի (Գ 297) նրա դագաղը փոխադրվեց Դվին, Ասողիկը (էջ 106) գրում է «ի սորայ (Սմրատ Աբլաբաս իշխան) ասուրս ի ՄՂ թուականին (841—842) Խալիթ իպն Եզիդ հայոց ամիրայ եկն և էանց բաղմութեամբ ի Վիրս և մեռաւ ի Զաախս ի գիւղն-որ կոչի Խոզաբեր»:

95. Մուհամմադ իբն Խալիդ (845—849): Նախորդի որդին էր, ըստ Յակուբիի (էջ 121), Կադանկատուացին (էջ 378) նույնպես հիշատակում է «և ի նմին ամի սատակեցաւ (Խալիդը) իսկ նորուն որդին եկեալ էառ ղաշխարհս սրտվ և գերութեամբ»: Նրա հետ միաբանեց Աշոտ Կյուրապաղատի որդի Բագրատը: Նա կովեց Թիֆլիսի Իսհակի և ծանարների դեմ:

Սրանից հետո Մուտավաքիլը նշանակեց իր որդուն:

96. Մու'տազզ Բիլլահին (849): Նրա նշանակման թվականն է Հիշրի 235 թ., ըստ Յակուբիի (էջ 122) և Թաբարիի (էջ 96), իսկ Հիշրի 234 թ. է տալիս իբն ալ-Աթիրը (Ե 19): Մու'տազզը կամ Իբրահիմ Մուայիդ Բիլլահը, ըստ Յակուբիի վկայության ունեւր Ասորիքը, Ատրպատականն ու այլ վայրեր, որով նրա կողմից փոխանորդ նշանակվեց:

97. Աբու Սալիդ Մուհամմադ իբն Յուսուֆ ալ-Մաբուազին—849—850, որին հայ պատմիչները կոչում են Աբու Սեթ (Հովհ. կաթ. էջ 149), Թովմա Արծրունի (էջ 183), Ասողիկ (էջ 102), Օրբելյան (էջ 169):

Պատմական վկայությունների մի փոքր շփոթ կա այստեղ. մանավանդ Աբու Սեթի և նրա որդու Յուսուֆի անունները շփոթվել են և մեկի անվան հետ կապված դեպքերը վերագրվել են մյուսին: Թովմայի վկայությունն ընդունելով իբր հիմք և մյուս աղբյուրներն էլ համադրելով, կարելի է դեպքերը դասավորել հետևյալ կերպով.

Աբու Սեթը գալիս է Հայաստան Մուտավաքիլ խալիֆի կողմից, հարկային խստություններն իրագործելու համար: Խալիֆաթը մոտ կես դար ներքին երկպառակությունից տկարացած և եկամուտներից զրկված լինելով՝ փորձում է իր դիրքը վերականգնել: Աբու Սեթի նշանակած հարկահանները՝ Մուսա իբն Զուրարան վռնդվում է Տարոնից և Ալան ծովափին պարտվում է Վասպուրականում (Թովմա, 188): Տեսնելով հայերի դիմադրությունը և իր ուժերի պարտվելը, Աբու Սեթը վերադառնում է խալիֆի մոտ, նոր ուժեր ստանալու համար: Խալիֆը կրկին է ուղարկում նրան, հրահանգ տալով ընկճել հայերի դիմադրությունը:

¹ Ընդունելի չէ Ֆասմերի (էջ 85) հայտնած կարծիքը, թե Խալիդ ոստիկանը հայ պատմիչներից ճշաւը կամ ճշօւ գոչվելը անվան աղավաղումից է առաջացել: Ըսա իս, նա հոլ է կոչվել մահմեդականներից իր բռնությունների և առիթ եղած սարսափի պատճառով: Ճշաւը արաբերեն լեզվով նշանակում է «սարսափ», «հաբեկում»: Եզիպուսի սֆինքսին ժողովուրդը Աբուլ-հոլ է ասում. մինչև օրս էլ արաբ մայրերը իրենց երեխաներին վախեցնում են «Աբուլ-հոլը դալիս է» ասելով:

Ճանապարհին նա մահանում է: Արու Սեթի մահվան թվականը աղբյուրները տարբեր ձևերով են տալիս: Յակուբին (էջ 122) տալիս է Հիջրի 237 թվականը (մ. թ. 851 հուլիսի 5—852 հունիսի 22), Թաբարին (էջ 96) և իբն ալ-Աթիրը (էջ 22) տալիս են Հիջրի 236 թ. (մ. թ. 850 հուլիսի 15—852 հուլիսի 4): Բելազորին (էջ 64) տալիս է Մուտավաթիլ խալիֆի 2-րդ տարին, այսինքն՝ 849-ի, բայց նա չի հիշատակում Աբու Սայիդին, այլ միայն Յուսուֆին:

98. Յուսուֆ ալ-Մաբուազին (851—852). նրա նշանակումը Յակուբին ցույց է տալիս (էջ 122) Հիջրի 237 թվին (մ. թ. 851—852), Բելազորին (էջ 64) թվականը չի դնում, Թաբարին Հիջրի 236 թ., իսկ իբն Աթիրը (էջ 25) Հիջրի 237 թ. է դնում:

Յուսուֆը դալիս է Հայաստան, ձերբակալում Տարոնի Բագարատ և Վասպուրականի Աշոտ իշխաններին և ուղարկում Սամառա Այդ արարքների դեմ ծավալվում է համաժողովրդական ապստամբություն: Նա գնում է խոլթեցիների դեմ և սպանվում:

Յուսուֆի սպանման թվականը դնում են Հիջրի 237 թ. (Բելազորի, էջ 65, Յակուբի, էջ 122, իբն Միսկավայհ, էջ 77, իբն ալ-Աթիր, էջ 25, իբն Խալդուն, Գ էջ 275, Տաղրիբերդի, Բ էջ 290): Ըստ Թաբարիի՝ ճշտագույն թվականն է Հիջրի 237 Ռամազան ամսին (852 թ. փետրվարի 26-ից-մարտի 26-ը), տեսնել և Հովհ. կաթ. (էջ 142), Թովմա Արծրունի (էջ 202), Վարդան՝ (էջ 80), Ասողիկ (էջ 107), Սամվել Անեցի (էջ 92), Կիր. Գանձակեցի (էջ 73), Օրբելյան (էջ 169):

99. Բուղա ալ-Քաբիր ալ-Շարաֆի (852—855): Հայերի ապստամբությունը զսպելու համար ուղարկվեց Բուղան, որի հալածանքները տևեցին մինչև 855 թվականը: Նա ուղարկվեց Հիջրի 237 թ., ինչպես վկայում են Բելազորին (էջ 65), Յակուբին (էջ 123), իբն Միսքաուայհ (էջ 78), Թաբարին (էջ 98), իբն ալ-Աթիրը էջ 26): Տաղրիբերդին (Բ էջ 295): Նա վերադարձավ Սամառա Հիջրի 241 թ. (մ.թ. 855—856), ըստ Բելազորու (էջ 65):

Բուղայից անմիջապես հետո նշանակված երկու ոստիկանների մասին հիշատակություն կա պատմական աղբյուրներում:

100. Իբրահիմ (856), որի անձը շատ ծանոթ չէ. ըստ Թովմայի (էջ 311) Բուղան գնալիս նշանակեց «զԱպրահիմ ոմն»:

101. Մուհամմադ իբն Խալիդ իբն Եզիդ իբն Մազյադ (857, երկրորդ անգամ), որի մասին վկայում են Յակուբին (էջ 124), Կադանկատուացին (էջ 380), «Մահմետայ Խաղթի որդու» բառերով, առանց թվականի: Ճշտման, համեմատելով իսկապես խիստ հավանաբար, Բուղայի մեկնելու հաջորդ տարին: Իսկ թե մինչև որ թվականն է նա մնացել, մնում է անորոշ:

Սրանից հետո, մինչև 862 թ. Հայաստանի վրա նշանակված ոստիկանի անուն չկա աղբյուրներում:

102. Ալի իբն Յահյա ալ-Արմանի (862—863). նշանակվեց ըստ Թաբարիի (էջ 101) Հիջրի 248 թ. Ռամազան ամսին (մ.թ. 862 նոյեմբեր), խոսում են նաև իբն ալ-Աթիրը (էջ 45), իբն Խալդունը (Գ էջ 283): Յակուբին (էջ 123) դնում է Հիջրի 249 թ., ինչ որ թվում է, թե սխալ է:

Նրա մեկ տարվա պաշտոնավարության կարևորագույն գործերը եղան Աշոտ Բագրատունու իշխանաց իշխան անվանվելը և Սամառայում աքսորված հայ իշխանների ազատ արձակվելը (տեսնել Հովհ. կաթ., էջ 169, Վարդան, էջ 82, Սամվել Անեցի, էջ 94, Ասողիկ, էջ 110 և 136): Ալին սպանվեց բյուզանդացիների դեմ մղված կռիվում: Նրա մահվան թվականն է Հիջրի 249 թ. Ռամազան

ամիսը (մ. թ. 863, հոկտեմբերի 18—հոկտեմբերի 16), Յակուբի (էջ 124), Մասուդի-Մրուզ Դ 214, Թաբարի, էջ 111, իբն ալ-Աթիր է—26)։

Այնուհետև սկսվում է Աշոտի իշխանապետության շրջանը։

103. Մու'իզզ — Մուտազզ խալիֆը իր եղբոր Մուրիզզին նշանակեց Ուալի (Վալի), իսկ՝

104. Ալա իբն Անմադ ալ-Ազդիին (865...?)։ «Ամիլ» ըստ իրն հալգունի (Գ 291)։

Հիշքի 251 թ. (մ. թ. 865) հիշատակում է նրան նաև իբն ալ-Աթիրը (է էջ 63), իսկ 252 թ. (մ. թ. 866)՝ Թաբարին (էջ 102)։

Սա նույն Յուսուֆ Մարուազիի կողմից նշանակված հարկահավաքն է։

105. Իսա իբն ալ-Շայխ իբն ալ-Սալիլ աբու-Մուսա ալ-Ջումհի ալ-Շայբանին (870)։ Արմինիայի ոստիկան նշանակվեց հեռացվելով Ասորիքից խալիֆի դժգոհության պատճառով Հիշքի 256 թ. (մ. թ. 870)։ Ըստ իբն ալ-Աթիրի (է էջ 94) և Աբու-Ֆիդայի, Բ էջ 51, Հիշքի 257 թ. (871), իսկ ըստ Թաբարիի (էջ 101) և իբն հալգունի (Գ 301 և 309)։

Իսա իբն Շայխի Հայաստանում ունեցած ուղղակի պաշտոնավարությունն ընդհատվեց մի քանի անգամ Ատրպատականում և Վերին Միջագետքում, խալիֆի դեմ ծագած ապստամբական շարժումներին նրա մասնակցության հետևանքով։

106. Ջաֆար ալ-Մուֆաուիդ (875). Հիշքի 261 թ. Շաուալ ամսին (9 հուլիս — 7 օգոստոս — 875 թ.), ալ-Մուտամիդ խալիֆը իր որդուն Ջաֆարին նշանակեց փոխարքա Եգիպտոսի, Ասորիքի, Մուսուլի, Արմինիայի և հորասանի (իբն ալ-Աթիր, է էջ 110 և Տաղրիբերդի, Գ էջ 33)։

Բայց արդեն մենք տեսնում ենք, որ 877 թվին Իսան Հայաստանում է գտնվում և ձեռնարկում է Պարտավում պատժական գործողություններ, իր նշանակած փոխանորդ Մուհամմադ իբն Աբլ-Ուահիդ ալ-Յամանիի դեմ (Թովմա, էջ 352), (Կաղանկատուացի, էջ 381)։

Իսան կռվեց այդ ապստամբի դեմ Աշոտ իշխանի գործակցությամբ, առանց նրան հաղթել կարողանալու։ Այդ ձախողանքից հետո վերադարձավ Ամիդ, որտեղ էր իր կենտրոնը։ Իբն ալ-Աթիրը ասում է, թե (է էջ 133) Հիշքի 266 թ. (879—880), երբ Իսան Ամիդումն էր և Մուսա իբն Ջուրարան Արզնում, խալիֆը փորձեց հեռացնել նրանց իրենց պաշտոնից, նրանք պատրաստվեցին զինված դիմադրություն ցույց տալ, որով խալիֆն պարտավորվեց պահել նրանց իրենց գավառների պաշտոնի մեջ։

107. Մուսամմադ իբն հալիդ (878, երրորդ անգամ), որն արդեն ոստիկան էր եղել 857 թ. Բուղայի հեռանալուց հետո. այս Մուհամմադին (մեր պատմիչների Ահմաթը)։ Նրա և Պարտավի Մուհամմադի ու Մանազկերտի Կայխյան Աբլբատ էմիրի միջև թաքուն հարաբերություններին ծանոթանալով, իշխանաց իշխան Աշոտը, հազիվ նա Դվին հասած, զինաթափ արեց նրա ուժերը և անփառունակ կերպով վերադարձրեց «ընդ նույն ուստի եկն» (Թովմա, էջ 358)։

Պատմական այս շրջանի դեպքերի շուրջը մի քիչ շփոթ կա։ Ըստ Թաբարիի Հիշքի 266 թ. (879—880) Հայաստանի, Մուսուլի և Դիար Բաբի'այի ոստիկան է։

108. Իսնակ իբն Կունդաշիկը (879)։ Նրա մասին այլ աղբյուրներից տեղեկություն չկա։ Ֆասմերն էլ (էջ 100) անորոշ է արտահայտվում նրա մասին, իբն էլ-Աթիրը (է էջ 133) Հիշքի նույն 266 թ. տակ նրան ներկայացնում է միայն

որպես Մուսուլի կառավարիչ և ոչ Արմինիայի Աշոտի թագավորական թագ ստաւելը խալիֆից, եղել է նրա միջնորդութեամբ. ինչպես վկայում է Հովհ. կաթ., էջ 175, Վարդան, էջ 85:

Եւրո սկսվեց Աշոտի թագավորութունը: Հայ պատմիչները տալիս են ՅԼԴ թվականը (Սամվել Անեցի, էջ 95, Օրբելյան, 175, Ասողիկ, 110, 111, 157), ուրեմն կամ 886 կամ 887:

Բայց այս տեղեկութունը խնդրո առարկա է դառնում, երբ գիտենք, թե իսա իրն Շախը այդ թվականին արդեն մահացել էր: Նրա մահվան թվական տալիս է Հիջրի 268 թ. (մ. թ. 881—882) իրն խալիֆը. իսկ Հիջրի 269 թ. (մ. թ. 882—883) իրն էլ Աթիրը (է, էջ 159) և Հիջրի 270 թ. (մ. թ. 883—884) Տաղրի-բերդին (Գ 46):